



Nunatsinni qanoq iliorluta, inoqarfiit annerit inoqarfiillu minnerit avinngarusimasullu eqqarsaatigalugit inuuniarni kkut atugassarititaasut, assersuutigalugu nerisassanik peqqinnartunik pisiassaqarneq, kiassarnermut kallerup inneranut, imermullu akit eqqarsaatigalugit, qanoq nammaqatigiinnerusinnaanerpup pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Juliane Henningsen, Inuit Ataqatigiit)

Kalaallit Nunaat Afrikalu arlalinnik assigiissuteqarput. Afrikap ilarujussua europamiunit nunasiaataanikuuvoq. Afrika isorartoorsuuvoq. Aamma Afrikami illoqarfinni nunaannarmilu inuuniarnermi atukkat assigiinngitsupilussuupput.

Afrikap ineriartornerani soqutiginarporpassuarnut pisimasunut ilaavoq, Afrikamiut ikittuinnaat illup iluani ikkuttakkamik oqarasuaateqarmata. Afrikami nunaannarmi illumut ikkuffilikkanik oqasuaatilersuinissaq akisuupilussuusussaavoq. Imaangilarli Afrikamiut oqarasuaateqanngitsut. Oqarasuaatit angallattakkat atorpaat. Teknologimi aqutissaq ataaseq alluinnarnikuuaat. Taannaannaangilarli. Afrikami oqarasuaat angallattagaq sunut tamanut atorneqartarpoq, uagut sungiusimaneruarput internet atussallugu. Oqasuaammik angallattakkamik soqanngikkaanni, taava attartortoqarsinnaavoq, soorlu uagut qanga sumi tamaani telefonbokserallarnitsit.

Maani Kalaallit Nunaanni politikikkut aqqiissuusaanerput kiffartuuteqqunermik tunngavilipilussuuvoq. Kalaallit Nunaanni politikikimi aallarniutigineqartarpoq Danmarkimut qanoq piumasaqassanersugut. Kalaallit Nunaata lumumbaa Jørgen C. F. Olsen tusaamasanngorpoq oqarnikuugami, guutip oqaluffissani utaqqisariaqaraa, Sisimiormiut aalisakkerivissartik massakkorpiaq atorfissaqartimmassuk. Ulloq manna suli namminersorlutik oqartussani politikikimi nukippassuit atorneqartarput oqallisigalugu kina sumik tunineqassanersoq. Innaarsuit nutaamik oqaluffittaassappat. Pisassiissutit allatut agguarneqartariaqarpat imaluunniit amerlineqassappat. Nunaqarfinni iffiq qanoq akeqassava.

Apeqqutit taamaattut aallaavigaat namminersorlutik oqartussaniit, kina sumik pissanersoq. Kukkuneruvorli namminersorlutik oqartussanut piumasaqartuarneq. Aperisariaqaraluarpugut: namminersorlutik Oqartussat qanoq ikiorsinnaavaannga imminut eqqaamiumalu ikiulernissannut?

Afrikami ineriartornermi aallaaviuvoq annikitsuinnarnik nukinnik peqarneq qitiusumik naalakkersuisoqarfiit amerlanersaasa akissaqartinngilaat teknologi nutaaq nunaannarmut siammartissallugu. Taamaattumik afrikamiut aqqiissutissanik namminneq nassaarniartariaqartarput, taamaasillutik maannakkut siunissamilu teknologi pisariaqartinneqartoq takusarpaat, qanga atortut pinnagit. Taamaattumiguna angallattakkanik oqarasuaateqartut illup iluani ikkuffilinnik oqarasuaateqaratik.

Eqqartoraangatsigu nunaqarfinnut isorliunerusunullu attaveqaasersuinissaq, eqqarsaatigisarpaput attaveqaatit qangatut sanaat. Innaallagissiorfiit dieselitortut, pisiniarfik sunik tamanik pilik, anartarfiit igittakkat allallu inuunermut nutaaliamut attuumatittakkagut.



Kisianni peroriartornitsinni tamakkut atortuupput, nunarsuarli allanngorluinnarnikuuvoq. Qitisumik innaallagissorfeqarnissaq aaqqiissutissani pitsaanerpaajujunnaarnikuuvoq, immaqa solpanilit, fuelcelle generatorit aamma kissarsuutit nammineq gasiliamik atortut sumiiffiit ilaanni piukkunnarnerugaluarpot. Niuertarfiit aamma qangatut ikkunnaarnikuupput. Amerlasuutigut pitsaanerpaavoq internetikkut pisiniarfigineqarsinnaasumik niuertarfiuteqarnissaq akuttusuumik atortakkat eqqarsaatigalugit.

Inuiaqatigiit tunngavilernikuuagut eqqarsarluta qitisumik naalakkersuisut suna tamaat isumagissagaat. Imeq, kiassarneq, innaallagiaq, atuarfiit, niuertarfiit suliffiillu. Kisianni sooruna taamatut ingerlasugut?

Namminersorluni Oqartussaaneq eqqunnikuuarpot. Amerlasuutigulli imaaginnarpoq, aqutsineq Københavnimiit Nuummot nuunneqaannarsimavoq. Namminersorluni Oqartussaaneq ilumoorukkutsigu, taava Namminersorluni Oqartussaaneq tassaasariaqarpoq, tamatta immikkut akisussaaffimmik tigusissasugut. Imaanngilarli taama pisoqarpat inoqarfinnut minnernut tapiissutit tamarmik unitsinneqassasut, paarlattuanilli imaalertariaqarpoq Kalaallit Nunaanni tamatta ataasiakkaarluta uagut inuunitsinnut tunngasut aalajangertalissagigut tulleriiaarlugit.

Demokraatit isumaat naapertorlugu namminersorluni oqartussaaneq tasaanngilaq, Namminersorlutik Oqartussat qanoq ikiussaneraannga. Apeqqutaasariaqarpoq, namminersorlutik oqartussat qanoq ikiorsinnaaneraannga nammineq ikiulernissannut.

Qujanaq oqallinnermut pissanganartumut